

Negociacion entre AVP y OLA a yega su fin: Formacion a bira $7 + 2 = 0$

ORANJESTAD(AAN) E negociacionnan entre AVP y OLA pa loke ta trata formacion di un gobierno nobo, a yega ayera na e punto culminante di fracaso.

Despues cu un ultimo intento a worde haci entre lidernan di partido AVP y OLA, pa na ultimo momento tog trata di logra un formacion entre AVP y OLA, e reunion

di ayera no a duna resultado positivo pasobra tur cos a caba na arroz con coco.

Ayera anochi mes lider di partido OLA, señor Glenbert Croes a comenta cu pa OLA e ampliacion di e gobierno nobo cu dos ministro manera cu AVP tabata desea, no tabata algo cu OLA por a para su tras.

Partido OLA por com-

pronde cierto argumentonan di AVP pa cu e ampliacion di gobierno cu dos ministro, pero OLA ta haya cu e ampliacion no por worde hustifica y menos den e situacion actual caminda pueblo ta spera di un gobierno nobo cu esaki ta bay reduci gastonan drasticamente y no cu OLA ta bay participa den un gobierno

cu ta bay costa pueblo mas placa ainda.

Pa OLA ampliacion di gobierno cu dos ministerio kiermen cu e aparato gubernamental ta bay costa pueblo mas placa na salario y tur sorto di gasto adicional y di un caminda esaki mester bin y pueblo no por bay paga pa esaki, segun OLA.

OLA su posicion ta cu mester bay duna Aruba un mihor gobierno cu ta bay maneha e pais efectivamente y no cu ta cuminsa caba cu mas gasto;

esaki no por ser hustifica y aki ta caminda cu OLA a para duro y mustra AVP cu loke AVP kier NO POR!

Awor cu formacion a tranca y resulta den un fracaso total, no ta keda nada otro cu formador señor Henny Eman mester bay cerca gobernador y entrega su encargo pa asina gobernador bay tuma e siguiente paso, sea ta nombra un formador nobo si tin espacio ainda pa un formacion nobo o ta proclama eleccion nobo.

Masha hopi bagamunderia ta tumando lugar na e cas

Choller ta biba cerca su mama anciana

ORANJESTAD(AAN) -- Bisiñanan a avisa FCCA di e situacion pero nada a worde haci. Ta masha hopi bagamunderia ta tumando lugar den e cas den Mandolinstraat caminda un adicto na droga a bay biba cerca su mama, un anciana.

Informacion cu a drenta na redaccion di DIARIO ta mustra cu ta reina un situacion fastioso den e cas situa den Mandolinstraat 29. Bisiña a yama FCCA varios biaha y a notifica nan di e problema pero nada ta worde haci.

Ta asina cu den e cas aki ta biba un señora di mas o menos 90 aña y tin un yiu choller ta biba cerca dje. Tur sorto di bagamunderia ta tumando lugar paden y pafor di e cas aki.

Hopi choller ta bay topa otro na e cas aki pa asina nan usa nan droga, haci desorden, manda otro cu boter y piedra. Hopi cos menos bunita ta tumando lugar na e cas aki. Habitantenan den Madolinstraat ta fada di e situacion aki.

Actualmente e yiu choller ta encarecla na KIA y habitantenan di Madolinstraat a kere cu cos lo calma pero tur cos a sigui mesun cos.

Recientemente e señora a opera wowo y e no ta move mucho mas. Dios sa con e señora ta bibando cu tur e chollernan aki ta drenta y sali su cas y haciendo tur locual nan ta haciendo eyden. Habitantenan ta suplica e instancia concerni pa tuma medidanan necesario pasobra loke ta tumando lugar paden y pafor di e cas ta masha mahos bista y mal chempel pa e criaturanan den e caya aki.

Habitantenan di Pastoor Hendrikstraat ta pidi ayudo

Motociclista irresponsabel ta spierta tur hende den oranan di madrugada

ORANJESTAD(AAN) -- Habitantenan di Pastoor Hendrikstraat ta sumamente disgusta cu un motociclista cu ta haya ta bon pa entre 12'or y 2'or di madrugada pasa den e caya aki y haci masha desorden.

Door di esaki tanto hendenan grandi como mucha ta

spanta y ta spierta. Yamada cu a drenta na redaccion di DIARIO ta mustra cu habitantenan ta yama Polis pa ayudo pero nan no ta haya e ayudo cu nan ta desea di haya. Polis simplemente no ta haci nada. Habitantenan ta puntra unda Polis ta keda na momento cu nan mester di nan.

Fondo recauda pa viaha pa New York

ORANJESTAD [AAN] Grupo di hoben di Apostolado Mundial di Fatima Aruba (Blue Army) pa luna di Juli ta organisando un bake-sale pa recauda fondo pa nan viahe pa New York den luna di Juli. E viahe lo ta un retiro y intercambio cu hobennan di Aruba y e diocesis di New York, cu aña pasá a bin Aruba pa un retiro. E bake-sale lo ta diasabra 9 di Mei for di 11'or di mainta pa 2'or di atardi na Centro Blue Army, San Nicolas.

Telefonnan di DIARIO

826747

